



Bosnia and Herzegovina
Federation of Bosnia and Herzegovina
CANTON SARAJEVO
Ministry of Justice and Administration

Broj: 03-07-04-24958/26
Sarajevo, 29.06.2026. godine

SKUPŠTINA KANTONA SARAJEVO **Predsjedavajući Skupštine, Elvedin Okerić**

PREDMET: Odgovor na zastupničko pitanje zastupnice u Skupštini Kantona Sarajevo, gđe. Sebijе Izetbegović

Zastupnica u Skupštini Kantona, gđa. Sebijа Izetbegović uputilа je dana 27.04.2026. godine zastupničko pitanje koje je dostavljeno Ministarstvu pravde i uprave Kantona Sarajevo dana 07.05.2026. godine:

„Upućujem zastupničko pitanje Ministarstvu za nauku, visoko obrazovanje i mlade Kantona Sarajevo, Ministarstvu pravde i uprave Kantona Sarajevo, Uredu za borbu protiv korupcije i upravljanje kvalitetom KS i Univerzitetu u Sarajevu (UNSA) sa predmetom: Zakonitost sticanja akademskog zvanja i ispunjenost uslova za izbor i zvanje vanredne profesorice.

Ministarstvo pravde i uprave predstavlja jedan od ključnih stubova pravnog sistema Kantona Sarajevo, odgovorno za zakonitost rada institucija i pravnu sigurnost građana. Upravo zbog toga, osoba koja upravlja ovim ministarstvom mora imati nesporan profesionalni i akademski integritet. Ministar pravde ne može biti predmet pravne dileme. Posebno zabrinjava činjenica da postoje ozbiljne indicije da prilikom izbora u zvanje vanredne profesorice nisu bili ispunjeni osnovni zakonski uslovi, prije svega u dijelu koji se odnosi na postojanje naučnih radova u relevantnim međunarodnim naučnim bazama.

Ukoliko kandidatkinja nije imala naučne radove indeksirane u relevantnim bazama, niti je dostavila dokaze o tome, a komisija u svom izvještaju nije jasno navela baze u kojima su radovi indeksirani, postavlja se osnovno pitanje da li su zakonski uslovi uopće bili ispunjeni, te da li je izbor izvršen suprotno Zakonu.

Uzimajući u obzir navedeno, tražim da se dostave precizni i nedvosmisleni odgovori na sljedeća pitanja:

I. ZAKONSKI USLOVI ZA IZBOR

- 1. Da li prema Zakonu o visokom obrazovanju Kantona Sarajevo („Službene novine KS”, broj 33/17) postojanje naučnih radova u relevantnim međunarodnim naučnim bazama obavezan i osnovni uslov za izbor u zvanje vanrednog profesora?*
- 2. Da li kandidat koji nema naučne radove indeksirane u relevantnim bazama može ispuniti zakonske uslove za izbor u ovo zvanje?*

II. ISPUNJENOST USLOVA U KONKRETNOM SLUČAJU

- 3. Da li dr. Darija Softić Kadenić u momentu izbora imala naučne radove indeksirane u relevantnim međunarodnim bazama (Scopus, Web of Science ili druge)?*
- 4. Molim da se dostavi dokaz o indeksiranosti radova u tim bazama.*
- 5. Ukoliko takvi radovi ne postoje, na osnovu čega je utvrđeno da kandidatkinja ispunjava zakonske uslove za izbor?*

III. DOKAZI I POSTUPANJE KOMISIJE



6. Da li je kandidatkinja dostavila ispis iz relevantnih naučnih baza, kao obavezni dokaz ispunjavanja uslova iz člana 96. Zakona o visokom obrazovanju KS?
7. Ukoliko nije, zbog čega je Komisija prihvatila prijavu kao urednu i potpunu?
8. Zbog čega Komisija u svom izveštaju ne navodi u kojim relevantnim naučnim bazama su indeksirani radovi kandidatkinje, iako je to obavezan element obrazloženja?

IV. ODGOVORNOST I NADZOR

9. Ko snosi odgovornost za eventualno utvrđivanje ispunjenosti uslova bez postojanja zakonskih propisanih dokaza?
10. Da li je Ministarstvo za nauku, visoko obrazovanje i mlade KS vršilo nadzor nad ovim postupkom?
11. Da li je Ured za borbu protiv korupcije KS razmatrao ovaj slučaj u kontekstu eventualnog kršenja zakona ili zloupotrebe položaja?"

ODGOVOR

Povodom zastupničkog pitanja kojim se traži očitovanje Ministarstva pravde i uprave Kantona Sarajevo u vezi sa postupkom izbora u akademsko zvanje vanredne profesorice, Ministarstvo pravde i uprave Kantona Sarajevo daje sljedeće očitovanje:

Postupci izbora u akademsko zvanje provode se u skladu sa Zakonom o visokom obrazovanju i općim aktima Univerziteta u Sarajevu. Za provođenje tih postupaka i donošenja odluka isključivo su nadležni organi Univerziteta, uključujući stručne komisije, naučno-nastavna vijeća i Senat Univerziteta.

Ministarstvo pravde i uprave Kantona Sarajevo nije učestvovalo u postupku izbora u akademsko zvanje na koje se zastupničko pitanje odnosi, niti je zakonom ovlašteno da učestvuje u bilo kojem izboru akademsko zvanja, ocjenjuje ispunjenost naučnih i stručnih kriterija kandidata ili preispituje odluke nadležnih organa Univerziteta donesene u okviru njihove zakonom garantovane autonomije.

Postupak izbora u zvanje vanredne profesorice na koji se odnosi zastupničko pitanje proveden je početkom 2021. godine, prije stupanja aktuelne ministrice pravde i uprave na izvršnu funkciju u Vladi Kantona Sarajevo, a proveli su ga i okončali zakonom ovlaštena akademska tijela Univerziteta, pa ovo ministarstvo nije nadležno da potvrđuje niti osporava zakonitost pojedinačnih postupaka izbora u akademsko zvanja, jer se radi o postupcima koji se provode pred drugim, zakonom ovlaštenim organima.

Neovisno o navedenom, a radi cjelovitog informisanja, postupak izbora u akademsko zvanje i postupak imenovanja ministra predstavljaju dva odvojena postupka koja se provode pred različitim nadležnim organima, na osnovu različitih propisa i uz primjenu zakonom propisanih uslova. Akademsko zvanje nije zakonom propisan uslov za imenovanje ministra u Vladi Kantona Sarajevo te pitanja koja se odnose na postupak izbora u akademsko zvanje ne predstavljaju pravno relevantnu činjenicu za ocjenu ispunjenosti uslova za obavljanje ministarske funkcije.

U postupku imenovanja utvrđeno je ispunjavanje svih zakonom propisanih uslova za obavljanje funkcije ministra, o čemu postoji uredna službena dokumentacija.

Ministarstva pravde i uprave Kantona Sarajevo će i ubuduće postupati isključivo u okviru svojih zakonom propisanih nadležnosti, uz puno poštivanje autonomije Univerziteta u Sarajevu i nadležnosti drugih institucija utvrđenih zakonom.

S poštovanjem,

Dostaviti:

1. Naslovu;
2. Stručna služba Vlade Kantona Sarajevo;
3. Evidencija;
4. U spis;
5. a/a.

